

四庫全書

集部

欽定四庫全書

學餘堂詩集卷二十二

翰林院侍讀施閏章撰

七言古

貧交行為程山尊作

富交長閉門貧交長開樽富交張四筵吐嗟多德色貧  
交傾斗酒意氣深相得不及見君盛時貧結客祇今黃  
金散盡非疇昔片言岐路遇知已開襟倒篋無所惜一

卷新詩雪不如滿眼富兒眼堪白園林細雨共繙書山  
寺疎林同躡屐聞君舊向邗江住怕見乘車喜儒素世  
澤猶餘諫草存窮吟莫為詩篇誤酒傾一石書萬卷屈  
躄還須猛虎步狂客從來悲倦遊丹楓殘菊繫離愁聞  
說春帆下揚子幾時來醉宛溪頭

桐塢短歌訓贈程非二

張拳欲搯南山虎袖手低眉卧桐塢海水怒翻桐摧殘  
鳳吟猿嘯聲辛酸白榆彥會須臾歇

新安舊有白榆社皆名宿霜天

雲散留寒月，籜冠避世棲。  
牆東當年玉樹，今山翁黃山。  
數峯夜驚走索之，乃在君懷袖。  
日日公榮酒滿壺，眼中人識酒人無。

相逢行寄陳說巖學士

昔在都亭因濁醪，長安耆舊相招要。

天子崇儒聚文士，揚班賈董紛吾曹。  
新秋細雨涼別墅，長謠短詠懽深宵。  
酒闌脫帽半頭白，惜別憂來增鬱陶。  
高都學士獨年少，皎然玉樹凌丹霄。  
石閣校書朝索筆，

金門下直晚回鑣相逢恍與始相識文章款曲心魂交  
我出春明躡嵩頂中原萬里風蕭蕭三花已落根株古  
少室斜穿星漢高緱嶺仙人逝超忽抱書歸卧守蓬蒿  
尺素傳來開老眼陳遵健筆回斗杓八人方駕吾老矣  
不鄙謂我諳風騷論詩精域那能造

君詩有宛陵含清  
真論詩造精域之

句廢學雄心早寂寥丈夫經術重喬嶽笑看詞賦成鴻  
毛涵都茹京偶披寫掣鯨倒海生風濤出水芙蓉曜朝  
日盛年策足真人豪吾家侍御與君好

謂研山

贈遠豈必

雙瓊瑤歌成不寐搔短髮起看江月飛寒潮

東渚草堂歌贈梅八丈子翔

東渚草堂大如掌蘿軒竹閣清溪上東渚閒園半畝餘  
谿光樹影何森爽主人舊是子真裔掣電空羣許騏驎  
少年詞翰早飛揚未老巖林甘棄置門留三徑長蓬蒿  
坐揖吾曹論文字種蘭滿砌花滿溪遠籬叢菊無東西  
臨流抱甕手灌溉飲露餐英日杖藜我來十月花枝少  
傲霜猶賸黃花好舊時兄弟盡零落獨酌花前成野老

興移得句襟顏開碧雲暝合呼餘杯卧病三年身好在  
掉頭萬事歌莫哀歌莫哀髣已摧好束藏書堆列架醉  
看鷗鷺眠幾回

黃門高冢歌

萊陽姜給諫如農明末建言觸忌廷杖謫戍宣州衛  
會國變道阻逾數年始至遺命卒葬敬亭山下吳中  
士大夫私謚為貞毅

謝公久逝杜韓死敬亭佳客能有幾竭來突兀姜黃門

生愛敬亭死不已黃門不是愛山川憤切遺忠痛心髓  
一杯之土五尺墳明末孤臣某在此平生骨鯁重如山  
怒撓虎豹號天關身幽詔獄杖闕下偷生豈復思人間  
薄譴忽謫宣州戍荷戈便踏江南路時艱中道阻干戈  
亂後重來已遲暮國步雖移心未改家園無夢歸東海  
誓言埋骨敬亭陸貞魂毅魄留千載於乎魂歸閭闔將  
如何欲就重華舊淚多蓬萊水淺碣石泐黃門高冢長  
嗟峨



徐田東見遺石溪偃松圖蓋摹東坡墨本

高人揮秃筆天地為軒輊君不見此偃松畫者誰鬱盤  
轉作干霄勢前有東坡後石溪胸中同此礫石意官家  
宮闕童千山爾獨長留巖壑間詰曲杈枒飽霜霧神全  
節密多古顏於乎石公生前好畫與余善惜我未致鶻  
溪絹愛君古人心一片但願守此數相見

醉後為周雪客題松林抱膝圖

層巖怪石紛龍嵒老松鐵幹根青銅江天漠漠來長風

誰獨坐者蒼山空老病看人眼欲白望氣知為周雪客  
豐頤廣顙不尋常骨重神清愛山澤前年走馬長安市  
客舍高齋面秋水題詩一出驚公卿挾策行將謁

天子爾翁意氣橫高天君才豪俊尤少年顧厨結客凡  
幾輩書畫經時又滿船春華方盛詩已老老成更數何

人好二酉家藏讀父書蓼莪淚盡收遺草

君方輯先公遺集

金

陵耆舊隨東流時人衮衮徒公侯多君父子能好事殘  
編陳蹟時討求即今抱膝亦不惡脫手黃金未蕭索薄

遊君自敬亭回北樓坐對銜金杯  
我來重酌秦淮酒倚醉同登周處臺  
才雄心小君努力暫時雌伏休  
衰稂夜闌拂袖題長句我亦山中尋桂樹

敬亭遲新安曹使君不至

山城新漲驅山去把酒含情對芳樹  
五馬雙旌望不來雨中花落春垂暮  
敬亭雲氣連天都索羣鸞鶴聲相呼  
不知此夕宛溪淚能到新安江上無

題劉緘齋樵客圖

倚青松踞盤石出入千山萬山碧世人皮相識不得山人故是江海客華陽學士心相憐五侯七貴皆前席白眼長安忽倦遊掉頭歸卧鳬峯宅於乎買臣富貴殃其身何若行歌長負薪

悲老牛

老牛躑躅心悲酸上嶺下嶺走新安新安諸嶺石齒齒淚盡蹄穿鞭未已吁嗟力不勝驅使行行入肆充甘旨此邦百萬多豪家炊金饌玉紛如麻一嚙不備亦何憾

相恬成俗無咨嗟君不見黃衣入夢語爭傳又不見救  
母藏刀尤可憐殺業相尋緣食肉爾有大功人不錄昔  
時力盡為君耕今日忍棄供鼎烹不辭刀俎吞聲泣請  
君看取盤中粒

割蜜篇

避兵水  
東作

山蜜栽栽傍山屋剝木作房相纍屬過午放衙飛滿檐  
花盡采花心不足青桂開殘叢菊黃戢羽藏身天欲霜  
持刀割取鑱子甲慘澹糾纏不出房強憑烟灼驅除去

欲行未行心却顧不辭辛苦為君甜  
衷猶覓空房住  
爾聚爾族且莫嗔殘膏霑潤安爾身  
棄家骨肉不遑惜  
獨歎流離烽火人

避亂偶還見荒園叢菊方華慨然有作

主人灌園不出門手栽叢菊沿深村  
秋來叢菊花開滿  
主人避地留虛館人間萬事逐烽烟  
幾處青燐生井廬  
溪叟潛歸暫亡恙憑誰杯酒酌花前

酌水歌贈張兩水

酌水懽四坐請為兩水歌昔時共學並年少今日相看  
鬢已皤鬢已皤可奈何甌石雖屢空今名一何多昔汝  
大父維尚書銓衡手握澄水壺睥睨權璫能嶽立早愛  
青山歸五湖懿靖先生尤卓犖不官獨嗣盱江學中年  
戰勝兼逃禪鹿門妻子皆藜藿多君世胄貧不愁賣藥  
街頭韓伯休得錢供母苦不足便學何顓斷酒肉避人  
蒿徑隔山齋返哺烏巢傍茅屋尚書祠前水清妙錦樹  
丹霞相照曜君家三世稱賢豪萬事浮雲堪一笑請看

閔閔存幾家回頭盡作風中花

關中房儀凡駕部初令新鄉有殊績及聞李賊陷  
京師痛哭山中不食死鄉人私謚曰貞靖有表  
忠祠碑敬書短歌其後

文士綰符能殺賊罷官間難仍殉國義憤填膺死獨難  
吞聲絕粒無人識盲風動地摧山邱如此孤忠那可得  
於乎鯨鯢得志龍髯悲正氣哀歌又一時史不特書里  
有謚千人墮淚表忠碑君不聞清渭之涯太華麓墓上



寒猿時夜哭

大滌精舍圖

潛谷為湯  
巖夫畫

昨觀潛谷岳陽圖墨痕一掃天模糊林端縹緲丹樓出  
半涵煙雨浮菰蒲尺幅重看圖大滌林巒層峭炯縷析  
拍空萬壑走長風拔地千峯暗雌霓問誰居者黃山樵

湯自稱黃  
山樵者

愛餌神芝鑿青壁坐邀天海盪心胸側聆松

濤飛霹靂黃山樵者真孤寡席門陋巷滄浪邊采薇晞  
髮無處所作碑賣字餐寒烟梅村學士不相識新詩獨

賞心為憐造廬結轡事雖已海日江春句已傳

湯有緒山懷古

詩為吳學士偉業吟賞名遂顯

婁東逝矣淚如霰吾曹落拓復相見羽

書日夜警關河帶甲縱橫滿鄉縣敝裘落日換斗酒烈士哀歌倚雄劍買山歸卧定何年但捲疎簾見江練黃嶽天都不可攀大滌誰當共往還夢遊天姥亦虛語眼前一步三神山但令此圖常在手相看大笑開心顏

### 寄天都許青巖

青巖舊有青藤杖生掣蛟螭馴倔强苦心割愛傾所懽

作歌贈我餘惆悵亂來躑躅扶杖行懷君望遠攀孤嶂  
側聞松竹都亡恙重倚梅花酌佳釀我不共飲可若何  
興來拍手為君歌丈人家傍黃山住山房却在臨溪處  
丈人愛向黃山遊飛策天都最上頭住山遊山心總閒  
雕鏤雲物窮仙山雪翁千歲成逸友山有老白猿人稱雪翁蓮花  
百丈開懽顏黃山峯勢千手指就中耆舊今餘幾詞賦  
家風傳二子眼前萬事堪老矣殘編自向碧山藏仙客  
還分石髓嘗南村潭上東風暖應有春雲滿竹房

松巖圖短歌貽馬吉人

崇巖太古松俯視大夫輩借問盤空幾許長能繞橫枝  
出峯背幽人放眼凌華嵩會當置爾丘壑中松風謾謾  
溪雲合誰識孤吟拄杖翁

題金長真憲副小像

昔年同卧白雲樓醉吟並馬西山遊風煙荏苒二十載  
今日逢君仍黑頭細看此圖良不殊豐頤微笑疎髭鬚  
手挈瓶花傍盤石懸巖倒挂青珊瑚清虛寡欲阮千里

丘壑關情謝幼輿人生富貴誰不朽安得聲名滿人口  
使君五馬復千騎官達才多意良厚徧地干戈愁殺人  
披君襟抱如春酒薔薇花落坐新桐白苧歌殘橫北斗  
當塗努力好自愛君差雄健余哀醜

汪蛟門舍人三好圖

謂書酒  
聲伎

丈夫寄興皆偶然要令懷抱垂千年擁書把醖列絲竹  
富貴何必非神仙不爾僵卧且止酒殘編短帙商歌傳  
吾愛舍人好才思縱無三者良快意竹西況復風流地

雪色妖姬擅歌吹秦郵美酒吳閶書咄嗟充斥等閒事  
前年醉我燕市頭高歌月下解貂裘白門昨夜燈船曲  
嗚咽秦淮水不流可憐名士悅傾城桃葉楊枝舊繫情  
興闌開閣會遣去一壺一卷娛平生孫老倔强殊苦口  
大聲勸汝屏詩酒杜老戒書咄腐儒佯狂豈是高陽徒  
孫豹人杜茶村並有作積書人多讀書少我愛讀書今已老慚君  
詩思真涌泉被酒長篇疾如掃

金在吾苦吟圖

謝文侯寫照陳  
無名補木石

陳郎作畫謝老寫生當風玉樹真神清獨坐綠蕉倚文  
石望中知是苦吟客聞君卓犖讀父書好客平原亦不  
如乘風破浪有長策肯學五言七字為腐儒君不見吾  
儕青髯皆早疎

酒間贈鄭谷口

時谷口歷叙八分及漢隸諸碑  
書法又被大司馬敦促入都

八分健手天下知片紙尺璧傳京師諸王列第遍題契  
五嶽名藍半寫碑收藏富有羅百代上窮岫嶺下李斯  
篆籀銅盤及石鼓銘刻重搜太子池中年慘澹工漢隸

借問苦心摹阿誰  
溧陽拔官邵陽令  
石門禮器皆神奇

以上皆  
古碑名

摩挲軟勁非筆墨  
剝落金石光迷離  
錦帙牙籤

盡書畫旁通不合  
魚軒岐公侯延佇  
爭倒屣車騎刺促  
無間時勞人作達  
轉清暇解衣揮翰  
明燈下匹絹殘牋  
氣槃礴態遲勢速  
人驚詫義急窮交  
不顧身興耽古物  
寧論價高齋別墅  
夏猶花留我過從  
每涼夜飲君卮酒  
顏欲酡火雲滿眼  
鼓輦多單車見說  
燕山去谷口閒園  
奈若何



登清涼山歌

半生自向名山趣解組中年稱情懷北遊嵩少南武夷  
一枝撐空破烟霧世亂餘年仍薄遊剩水殘山思坦步  
無端一月坐秦淮領客終朝汗如雨籃輿忽舁石頭東  
新竹微風散巾屨到來不信是城中突見匡廬峯下路  
龍蟠虎踞何縱橫邃壑層山莽回互翠微亭廢翠微深  
山頂宋有翠微亭江色天風曳遙素巖阿古寺自疎鐘舊是陳  
宮避暑處六朝勝事總荒烟三山寒影如浮鷺巖棲川

觀多幽人望古聯翩足佳句昭明臺在馬蹄多玉局碑

沉春草暮

山頂高阜傳為昭明臺又有蘇文忠石刻今不存

一拂祠西峙講堂

風雨時聞鬼神聚僧開高閣並危巢雲挂長松疑瀑布  
愚山老人作客便當此中住不然自捲殘書徑歸去聞  
說秋冬楓葉春桃花倘得重來定看十里江城盡紅樹

塞翁行贈吳岱觀

塞翁昔住江湖畔萬頃琉璃堆几案塞翁忽作秦川客  
萬里間關青鬢白作客差同杜老時分符正值關西飢

官舍數椽鄰鬼火邊城百雉啼寒鷗三川小路新通蜀  
輪蹄日夜相奔屬廢中十馬九馬死官人走卒吞聲哭  
繪圖請命幾沾衣折腰早放淵明歸諸邊歷盡黃沙戍  
五月親看積雪飛此地古稱同谷縣子美哀歌淚如霰  
解綬還能築草堂題詩重為開生面

君修葺杜工部  
草堂邑人有記翁

歸自笑稱塞翁芒鞋布襪隨西東古來得失皆偶爾且  
作逍遙河上公

靈巖山

苔滿西施洞葉覆吳王井巖前對面碧湖灣美人留得  
蛾眉影麋鹿遊來池館平舊時響屧餘鍾聲粧臺洗盡  
看僧塢惟有春花歲歲生

徐健菴編修洗研圖

徐公健筆千人萬人見詞翰驚傳柏梁殿偶然休沐卧  
江湖塵尾閒揮看洗研珊瑚架筆金花箋賦就還應闕  
下傳誰知得意苦吟處夢在池塘春草邊

時仲氏果亭  
編修立齋學

士並官

京師

七十二潭漁父歌寄贈陳確菴孝廉

吳江千里連雲樹漁父狂歌鼓枻去震澤周遭滄海深  
七十二潭定何處平生故是出羣才片言落紙驚風雷  
公車掉頭不肯上心輕萬事如塵埃桑田變後甘檮散  
白日飛騰忽眈眈抱膝橫經木榻穿繞堂種竹花溪遠  
向來偶作諸侯客老卧惟耽五湖宅龍威丈人得見無  
大澤羊裘空髮白蒲葦零亂楓葉殷寒潭倒浸湖上山  
彌望關河箭滿眼江頭幾箇釣船閒

王太常煙客先生作畫見寄報以短歌

余寓書先生初未相識聞作畫後數日臂痛廢搦管  
亦見先生耄年特筆矣

畫家法變宋元後潑墨紛紛負能手太常一幅來婁江  
意遠神閒真罕有乍看僧巨然再觀癡子久晴山濕空  
翠輕雲冒林藪華頂天台恨未登見此使我心騫騰峽  
裏飛流迴積雪松間細葉垂蒼藤先生甲第舊平津八  
龍七葉多聞人時移身隱歸者舊巢許臯夔無等倫少

工書畫吐奇氣望古心追爭上駟中年惟作擘窠書老  
罷丹青倦人事誰邀異數苦經營是歲春秋八十四前  
賢折節收後生手書細作千餘字昔我視學山之東梅  
村為寫丈人峯剝水殘山走嶽瀆此圖氣象將無同側  
聞別墅冠吳中惜哉相望阻相從轉眼梅花照亭榭何  
時鼓舵披心胸但見高堂素障山千重

送歙州江允凝遊蕪江

山人生長黃山下一生愛作黃山畫殊松駭石非人間

俗眼羣看盡驚怪天都仙窟真靈竒不經身到誰能知  
拂雲憶共蓮峯坐對酒曾橫鐵笛吹勝遊一步一回顧  
到今猶記題名處可憐亂後總荆榛回首丹臺隔烟霧  
宛陵舊友今寂寞鼓棹於湖興磅礴殘暑風生水石涼  
高歌夜醉天河落笑君畧識敬亭山欲往瞿硎底未閒  
此別中秋餘幾日月明兩地各江灣

寄邱德俊大叅淮上是年七十

我昔同官爽鳩日先生平反稱第一及君出守漢陽時



讀禮余歸卧蓬室風烟從此各離居幾度門前楊柳疎  
為政聲名滿中外那可相思無尺書漢陽絡繹疲兵革  
褰帷四望頭堪白潁川渤海最循良漢水楚江盡恩澤  
是時治行天下聞歸夢常思淮浦雲東方千騎且麾却  
故山叢桂多清芬古來富貴如飛籜丈夫要貴能行樂  
如君有子過八龍二龍詞翰為人宗曙戒季貞如君得年已  
七十手把青樽髮如漆湖海元龍不可攀香山耆舊心  
長閒餘年且作歸田錄笑看沙鷗日往還

石公種松圖歌

畫是梅淵公筆

梅翁石公皆畫松，倔強不與時人同。石公飛錫騰黃嶽，萬松詭異羅胸中。竭來黃檗袈裟地，便擬手擎雙塢寺。  
廣教寺為黃檗禪師道場，俗稱雙塢寺。

莖草拈成丈六身，舊時雲鳥來依人。金雞舞罷吼龍象，種松欲徧無荒榛。上人逸興多如此，黃嶽千峯歸眼底。高坐松陰自在吟，役使神猿及童子。客來笑把種松圖，看取新松種幾株。俄頃空中聲謖謖，青天萬樹齊浮屠。為問西飛黃檗歸來無。

為饒景玉題畫

老我青鞵與布襪愛畫愛山都入骨近年於極嬾登臨  
空向此中興超忽石翁落筆來英靈三山五嶽歸毫髮  
願留坐卧十日看無數雲霞時出沒

稜毛行

田家飲泣罷為農悔不將田全種稜無苗高坐忍餓死  
無稜榜繫千家空可憐稜毛歲一割割剥非時稜不活  
況復山家種植稀咄嗟那可飽搜括官家作艦頻遣兵

樓麻聚斂盈空城麻雖倍直土所出樓非廢產從何生  
羽書飛促勢倉皇用三作一不相當誰知轉自蕪湖買  
婦無完袴兒無糧連歲兩河需柳埽芻粟三秦重荒耗  
普天萬國困軍儲分在供輸復誰告語卿忍淚且勿悲  
人間禍福無窮期不見西南戰地赤殺人如草鳥不食  
但令瘠土莫干戈力盡輸樓死亦得

有客行

殘書把讀長松下有客來尋濯園者采藥山童隔翠微

侯門稚子驚車馬停車贈我青琅玕促坐論文抒肺肝  
傍竹開尊復何有臨溪膾鯉延清歡昔我先人皆好客  
洙泗高談浮大白行觴子弟聚星辰併日琴歌出金石  
老夫十稔賦歸田有官不換東山眠削牘久慚事干謁  
堆盤何計羅肥羶以此齏鹽光舊德却看徒御少顏色  
妻子笑余留上賓無錢那合作官人回頭語卿吾累汝  
客去高吟聞四鄰

芥茶歌

芥茶勝事真罕見脫畧茗柯作香片顧渚月峽趨下風

倒戈羞與芥山戰芥陽絕勝無多地寸壤黃金爭品第

最老廟後稱冠軍紗帽碁槃亞兄弟

其他有新廟後犁尖扇面香袋手中

皮刀洞頂皆連壤異名

問誰造者唐與朱

唐子晉朱日如

苦心創獲前代

無抑揚徐疾有妙理俄頃能分氣味殊北海韓侯雉城

長玉川遺事傳清賞

刻有玉川遺事一書

石鼎金泉手自煎小酌

深嘗戒鹵莽就中甲乙難討尋賤耳歸求鼻舌心其甘

雋永香蘊藉非蘭非乳鮮知音時俗噉名吁可咤廣鼎

偏矜尺璧價今年始擷供

至尊廟產摘盡餘中下紛紛豪貴競徵求  
令君仰屋山家愁物色經時得一啜纔分半盞  
霑枯喉山是陽崖總砂石瘦吞雲日成芳潔  
廟後何偏奪地靈言人人殊莫能說幾處茶  
寒善損神將花熏染香失真氣幽色白此  
柔旨大葉粗枝翻絕倫牙筍鎗旗春太早  
月團龍餅添揉造桑苧天隨安可嗤後來踵  
事今人好酷耽水厄癡則那我強解事為  
茶歌芥園未到猶餘恨山靈妒我將

如何

余欲往登芥  
山會雨不果

渡錢塘留寄毛稚黃

吳山山下閉門久藥臼在傍書在手銷魂曾到宛陵書  
散病詎同湖上酒秋雨淫淫木葉黃我遊甌海渡錢塘  
龍湫知有千尋瀑訝許江漲別恨長

大龍湫歌

白龍倒影垂青天天河欲決成桑田驚濤一瀉五千仞  
曳為素練霏紫烟遊絲小駐勢不下奔雷迸射當我前



舉頭拍手相叫嘯回風急雨爭喧闐忽如玉女舞白紵

翠鬟長佩何翩跹矩那開山好心眼

矩那尊者開山有矩那亭

孤亭

冉冉來羣仙我吞名泉胸八九杖藜對此嗟老顛靈源  
涌出雁湖頂怒翻月窟稱龍淵謝公屐齒不到處榛迷  
徑塞重茫然下注錦溪歷斤竹東歸到海何時旋憑誰  
拾取玉井石蓮子種此湫底藕如船它時騎鹿重相訪  
會看十丈開青蓮

學餘堂詩集卷二十二

欽定四庫全書

學餘堂詩集卷二十三

翰林院侍讀施閏章撰

七言古

畫松歌為梅瞿山作

梅郎為我畫松索我歌古來畫松歌已多對君目駭奈  
君何但見修鱗巨鬣盤拏絕壑凌嵯峨咆哮騰虎豹怒  
掣奔竄鬣一株突裂餘霜柯神猿健鶻不得上空中壁

立寒藤蘿高枝獵獵翻風去白日寒山愁欲暮斲藥長

鑿客有無前峯木末橫烟霧同時畫手老禿翁

謂半山

往

往揮毫共奇趣世人不向黃山遊眼中那識真松樹請  
君酌酒且論詩休遣人間喚畫師梅郎掉頭濡墨稱不  
疲公孫大娘舞劍器朱亥壯士揮鐵椎丈夫豪氣亦如  
此何妨縱筆走蛟螭大笑山巔與水涯

賣屋行

老翁名姓君王識徵書屢下辭不得巾車欲發囊無錢

官田稅重誰買田數椽舊喜依山住減直今甘脫手去  
猶說官人反覆多縱買華堂難久據庭前榴樹正開花  
眼看已是他人家

觀宋牧仲比部家藏賜畫歌

宋侯世胄稱詞伯網羅墨蹟有奇癖自矜手眼曾摩挹  
家藏賜畫皆拱壁錦囊繡帶重色束堆案黃金不肯粥  
臨發江關要我看訝許光芒滿書屋玉女湘娥翩絕倫  
瓌姿奇服難具陳精移神駭看不定諦視方知是洛神

千年人物推周昉  
妃子撚花注幽想  
鸚鵡前頭無片言  
愁見東風自來往  
寫生更有山鷓鴣  
圖差池羣雀聲喧呼  
猩紅小墜周四角  
宣和譜載非模糊  
平坡大麓來獅子  
母顧其兒若狂喜  
電眸斗尾蹴寒空  
振壑摧林勢未已  
近時西域貢天家

至尊色動都人誇  
按圖比質母乃是  
青天黯淡揚風沙  
此皆坐卧可十日  
片時過眼徒咨嗟  
於乎文康相國調  
羹日名對有時前  
至膝詔頒珍畫寵  
三公宋元舊物宮

中出相國平生室如罄寶此丹青時嘯咏墨莊畫舫皆  
等閒賜出

先皇臣所敬可憐能事慘經營浩劫頻過光怪生什襲  
埋藏等棄置無人得見傷人情此日東南半豺虎銷沈  
粉繪如塵土君當秘此歸何許往渡黃河好護持毋使  
蛟龍橫攫取

何郎行贈何次德子大春

曾大父芝岳  
公故相國

何郎贈我賣船歌我方北轅子抱病今我重來未相見

流光逝水三年過  
炎燬愛把奇編讀  
山寺高桐間深竹  
丹青遣興不隨人  
風雨著書還滿屋  
眼中冠蓋何紛紛  
黃金叱咤成青雲  
何郎掉頭復抱膝  
酸吟苦嘯懷邱墳  
君家舊擁平津客  
珥筆分符世煊赫  
阿翁俊及最聲名  
少年豈合耽泉石  
於乎男兒礪砢千  
夫雄手掣霹靂開  
羣聾會當挽強射  
猛虎安能腐唇敝  
舌徒雕蟲

贈王侍讀太封公匡廬

瑯琊丈人瑯琊住  
閒心却夢匡山路  
朱輪累葉璽書封

注目寒巖展毫素岱宗東望海雲來小春暖放梅花開  
鳳毛五色紛滿眼萬事高歌酒一杯

對雪酬田第園長句

車馬塵中倦紙筆投詩報一常逋十霏霏雨雪永今朝  
長句驚看氣橫出未論彩翰灼雲霞早覺深衷託膠漆  
長沙痛哭非此時且可擁書送白日昔君作客重平津

文章甲乙何紛綸見推吾賦亞潘陸

曾客魏相國邸選  
刻詩文亟推吾粵

江賦意氣相親非衆人升沈雲雨多翻覆浩蕩江湖從隱



淪為園不少萬竿竹入饌那無千里萼如何被褐來金  
門借騎款段愁逡巡排風折翼公車久捧檄掉頭無五  
斗豈真詞賦解窮人能令萬事俱不偶一日君王問長  
卿賣文還有黃金否雪後西山滿眼明判解鷓鴣沽美  
酒

為喬石林舍人題扁舟看花圖

無數青山天際起白雲橫曳山松裏花滿東風雲欲飛  
扁舟誰坐看春水君之先公真御史舍人墮地成才子

文賦揮毫若涌泉眼底如君復有幾燕山雪霽柳條新  
射陽湖漲桃花春不知天上含香客何似花間倚棹人

次韻李武曾見贈

詞人腕弱如茅靡健手千鈞鼎可扛我薄雕鐫復哀晚  
無鹽老女醜無雙檣李李君有佳句攜來剪燭哦西窓  
塞北黔南歸杖屨風流意氣聯友邦新韭黃芽小開酌  
高言碎語如翻江比舍汪喬勝二仲

汪鈍翁舟次喬石林

文詞瓌

麗人敦龐談經欲據臯比坐策足思過天馬鬣燈明竹

葉汎薨枕春近梅花撲玉缸窮愁韓孟角險韻大呂洪  
鐘相擊撞滿眼緇塵好誰向須遊海嶽逢仙幢跼蹐輶  
駒不得去五湖間煞烟中艘奇兵銳卒火牛出坐看七  
十堅城降夜闌吟罷且酣卧天風颭颭吹銀缸

黃芽菜歌

萬錢日費鹵莽兒五侯鯖美貪饕輩先生精饌不尋常  
瓦盆飽噉黃芽菜可憐佳種亦難求安肅擔來燕市賣  
滑翻老米持作羹雪汁雲漿舌底生江東蓴膾渾間事

張翰休含歸去情

京邸寒夜戲題惱豹人起用其集中語

娶妻當得如西子  
娶妾當得如莫愁  
看君狂興有如此  
那可空牀獨卧悲  
白頭胸中撐拄幾  
千卷細故悲懽那  
在眼粗才莽氣橫  
飛揚百折迴腸時  
一展君不聞杜陵  
拔劍斫地歌西京  
野老奈爾何

李相國示心遠堂集奉贈

鳳城滿眼多高位  
誰存灑落滄洲意  
高陽才子今元老

欽定四庫全書

學府堂訓集  
卷二十三

六

俯視青雲獨孤寄示我山堂詩一編三山五嶽蟠胸次  
於乎古來作者有深義篇章不獨矜文字先生經術本  
閎深短歌長句皆瓌異郊居雜述憶田園詠史秋懷橫  
涕泗中間折衷及風騷異曲偏師安位置我昔獻詩良  
草草汎愛殷勤輒言好枉答瑤華亦偶然春風一日生  
枯槁雨散雲飛二十年吹噓重集長安道不信洪鐘憐  
瓦缶寧知溟渤收行潦對策誰能比仲舒虛名竊恐如  
殷浩高秋綠酒坐園林風議澄懷接蒼昊感公知已非

衆人不敢恩公甘跡掃連年蠻嶠愁鼓輦山多豺虎海  
鯨鯢

聖皇側席尚文治欲綏邛僊來雕題我公委蛇叅密勿  
天旋日轉無端倪才雄心小恩遇重卿雲颺拜翻含悽  
禮闈羅盡天下士龍門清峻誰攀躋腐儒愁疾將杖藜  
軟塵對面迷東西寒梅欲破忽惆悵雙柑苦憶聽黃鸝  
迂疎那稱平津客只合長鑱歸舊谿

戒壇二松歌并序

戒壇寺庭二古松東一株尤奇高裁及人便禿頂橫  
撐偃庭破壁余用虞伯生目松之語呼為支離叟又  
寺外南麓一株通體作偃蓋可蔭數筵舊稱松棚余  
輩藉草淹酌其下酹酒笑曰翁婆娑甚矣因命之婆  
娑翁作二松歌紀別

支離叟婆娑翁老夫西山三日過問我所得惟二松叟  
居戒壇紺殿東橫斜百尺走羣龍雪壓一枝西斷折出  
入小放中庭空翁踞南山最高麓一畝低覆陰龍葱主

人置酒成四坐白日不到生長風礪砢神物故偃蹇盤  
旋百變爭天工松乎松乎吾老去汝將奚從君不見慈  
仁寺裏蒼虬凡幾樹蹴蹋苦遭市塵汙何似山中攫雲  
霧

送毛會侯還祥符

時以博學鴻詞  
召試不得志

柳花乍逐東風飛燕山草綠春已稀游子思家正惆悵  
故人却向大梁歸大梁作吏神仙客鴻筆聲名動鸞掖  
文園獻賦舊凌雲丹陛談經應奪席幾度銜杯共御溝



有時並馬西山遊上書昨日不見收釣竿歸憶嚴灘頭  
劇邑專城殊不惡飲水三載偏蕭索絃歌且看河陽花  
寂寞何如天祿閣

送董蒼水

野客愛江梅躑躅愁長安一樽歌別曲四月商飈寒君  
昔寄詩滿紈扇到今頭白懽初見春水遙連三泖深誰  
信相思淚如霰當陽

聖主渴賢才聞君高卧機山隈詔書絡繹搜草澤詩篇

叱咤生風雷車馬黃埃那可歇交遊冠蓋宣城闕花筵  
縱飲數論文燈市聯吟曾踏月晨夕招尋通巷陌朔風  
忽送南歸客江鄉歲儉興難孤舊釀牀頭餘幾石眼前  
詞伯紛蹉跎自言垂老變風多倦遊閩粵復燕薊長悲  
烽燧思烟蘿於乎似爾不悲將奈何雲間故人寥落久  
梅花書屋思老友

謂吳  
六益

無計從看黃浦雲臨岐恨折青

門柳

# 華山歌贈王山史

華山突兀凌八荒仙掌摩畫摩青蒼洗頭盆水瀉銀漢  
斜挂星辰森在旁攀絙直上幾千仞俯看海日生扶桑  
韓愈當年驚眩處昔為絕險今康莊誰能羅致歸戶牖  
瑯琊先生有草堂霞舉烟霏何爛漫杖藜散帙隨昏旦  
奔騰腕下走鍾王研索牀頭窮繫豕安車強起棲僧閣  
夜夜山中夢紅藥蹠踐金門嬾上書公卿縞紵還垂索  
先生豈是塵中人披帷睚就多逸民所懼顧況尤比鄰  
謂亭林先生華山不作終南逕看爾三峯頂上身

已未夏家園老梅作四花余適同孫予立茅楚畹  
高阮懷並官翰林里中梅淵公諸故人作瑞梅  
圖歌索和漫題其後

金門客子苦棲遲故園梅發花幾枝花開不是梅花時  
青梅結子久垂垂園林此事亦罕見俄傳盛事爭稱羨  
花枝人數適相符四子同時登翰苑主人愛閒不愛官  
可憐親舊滿堂歡繪圖作詩侈花瑞封題卷軸來長安  
老梅憔悴非奇樹餘花再發人何與偶然作異轉傷心

當年吾叔高吟處時艱才盡徒咨嗟不待秋風便憶家  
三人少壯予獨老剩有星星兩髻華

貞孝歌為吳庶常母夫人

昔我交延陵倔强好詩格却來同燕山披襟露肝膈隴  
頭早梅寒未花石門才子思還家宮衣製作菜衣舞滿  
堂動色千人誇談遷彪固皆相繼雕龍世擅尋常事惟  
母聖善最劬勞伉儷忠貞動天地憶昔先公官石渠抗  
手請纓雄萬夫虞淵忽悲白日墜一身殉國無跼蹐母

將雛鳳方黃口官舟間難吞聲久捐生舉體付鼃鼃強  
活回心事姑舅漂搖亂後可奈何萬事悲辛黃鵠歌杞  
梁有妻侃有母昔也授書今鳴珂荏苒流光週甲子懷  
冰茹蘖逾三紀綺筵此日酌金樽魚腹當年甘海水我  
今與令子虎觀偕翱翔願將明月為母佩虹霞為母裳  
挹鴛湖以為酒把天目以為觴看我作歌歌洋洋千春  
彤管垂光芒

宋既庭孝廉南歸追送以詩

一年並轡燕臺遊苦憶銜杯醉虎邱徵車獻賦不稱意  
掉頭溝水東西流前日送君過清苑逾月重看故人面  
今日間君歸故園離筵不及春明門眼前萬事總銷魂  
吳中耆舊幾人存高枕著書元不惡目極江南紅樹村  
和田子綸水部移居元韻

載書何必三十車牽船住岸亦為家才雄官冷耽坐嘯  
身隨鷗鷺心麈麈避喧狹巷蹴茅屋虛檐煖處安蜂衙  
藥臼茶鐺足位置天然曲几容橫斜犢鼻偏嗤南阮富

俸錢小買東籬花牆短遠山見秋色那無深柳可藏鴉  
滑稽暫爾金門隱徉狂羞作漁陽搥幾輩朋來競高唱  
不妨鼓瑟驅靈媧

健松齋歌贈同年方渭仁編修

空庭老松攫雲霧一老衰衰朝復暮偕問含情奈若何  
主人舊日親栽樹風塵瀕洞橫干戈園館邱墟穴狐兔  
神護鬼呵知是誰霜皮鐵幹還如故先生有子今鷓鴣  
承明簪筆春華敷衣冠甲第韋平後詞賦風流揚馬徒



此時此樹森在眼回首故園私踟躕風木雖悲手澤在  
看松不與老人殊於乎礪砢神物千年好方君孺慕天  
下少

一草亭歌

秋浦吳次尾先生樓山草堂之前舊有暫亭既廢今  
其子子班復之沈徵君題曰一草亭聊寄短歌

樓山老屋藏書處黑風怒捲白日暮天憐斷木餘根株  
堦前突出凌霜樹昔留萬軸今一亭遺草猶含碧血猩

江月山雲愁不散長護亭前書帶青

題姚羹湖畫卷

姚官滇海陷賊中拔身來歸作山居圖見志

塵中白日眼模糊謁客重城喘未蘇矮屋纔高六七尺  
青桐恨少兩三株長夏炎蒸欲大叫祇應舴艋眠菰蘆  
誰寫此卷幅盈丈毋乃萬里江山圖野渡村帘見毫末  
空天古樹何扶疎傍水人烟接隴畝腰鑣刈黍者誰與  
層峯千仞忽壁立拂雲倒挂青芙蓉親經劍閣復洱海  
筆力故與他人殊浮廬老禪吾舊友自詡浮山天下無

謂藥公

知君邱壑有夙好一官轉徙罹艱虞脫身虎穴來

闕下驚看霜雪侵髭鬚不敢便乞歸田廬揮毫十指爭  
樵漁慈仁寺裏喜相見好向旗亭傾玉壺

聖朝解網寬遐陬孤臣會見恩霑濡但恐猶憐子卿節  
未許先耽賀監湖

題江青園前輩廬墓圖

辰六尊公

我失雙親初毀齒不成負土悲未已誰能血淚染松楸  
戀慕哀年如孺子昔聞大孝江次翁祇今又見青園公

神呵鬼護手栽樹巢烏夜夜啼  
天風千載墓門人下拜  
真州之北邙江東

為戴楓仲題丹楓閣

掉頭苦愛青山住  
擔簦偶踏長安路  
眼前突見層雲陰  
盤空草閣巢楓樹  
關西耆舊不離口  
華岳三峰擎在手  
老楓相伴寒不枯  
肯許風霜落葉無

送陸冰修歸海寧

大陸詩傳京輦徧  
滿眼公卿希見面  
聳肩抱膝短長吟

羞把文詞覓推薦東西學士苦相留一朝興盡成掉頭  
手攜襟被捲書畫出門便欲凌滄洲君家舊業連東海  
赭山翠壁爭礮磊捲簾几閣坐風濤盪胸日月生光采  
誰能破浪斬鯨鯢含愁攘臂號真宰去年邸舍吾比鄰  
袒跣相索無昏晨東亭看月許真率

謂集阮亭  
侍讀郎中

狂歌雅

韻何紛紛新聲共道諧金石吾愛開襟見冰雪酸風苦  
雨不嫌多怒流直挾天河裂於乎交道今何如與為輕  
薄寧龕踈縱令交盡天下士不如自著枕中書庭前秋

色催碧梧送君斗酒那可無歸心我亦懷東吳莫忘江  
頭雙鯉魚

奉和葉閣學題院壁

風吹不埽門前沙老槐蔽日成槐衙瀛洲亭廢池水竭  
灼爍不見芙蓉花高堂廣廈舊書屋石渠藜閣稱仙家  
到今燈火久寂寞幾人夜直聞宮鴉先生鉅儒親講幄  
獨陳絕學擣天葩分曹舊簡命筆削願洗瘡痍親搔爬  
樂飢日費太倉米病渴猶需金椀茶網羅放失憎老眼

狂來疊鼓思參撾龍門述作已千古此事那能無歎嗟  
汗青何日羣公在還山倘許餐朝霞

貞靖祠堂雙白松歌

嵯峨山下雙白松二龍夭矯丹祠中高枝遠接終南雪  
密葉長翻渭北風正直憑依人下拜婆娑父老走兒童  
問祠者誰樞部公平生勁氣凌飛虹事去龍髯攀不得  
吞聲絕粒悲填胸抗節深憐沒草莽貞魂直上排蒼穹  
鄉人俎豆令子痛手栽佳樹標遺忠關中植此良不易

霜柯廿載成青銅盤鬱心知資地力扶持敢謂非神功  
枯荊可茂木連理君親結念天為通華岳垂雲作霑漑  
故滋鐵幹森菁葱於乎武侯廟前千尺柏白松白松將  
無同

為高念東侍郎題衡山雪卷

雲樹合杳冥千山失翠屏何人住茆屋獨坐餐清泠平  
生不省因人熱自信前身許泉石有時拄杖躡孤峰俯  
視茫茫供眼白煨芋空山釀老春前村幾處梅花新誰



知鶴髦騎驢客別是人間冰雪身

徒步行

東安門外許肩輿東安門內止策騎入門半里史局開  
徒步往還渾閒事窮交況有兩三人攜手同行且稱意  
旁人大笑官可憐天街雨後尤迍邐東鄰有馬恥數借  
蹇驢欲買無青錢道逢列駟來喧闐避塵側足看高天  
我昔山中躡芒屨竹園花溪甘寂寞忝竊乘軒三十年  
召試還登石渠閣東方曼倩腹長飢國子先生齒已豁

聖主殊恩錄侍臣尚書筆札給來頻特詔分曹事編纂  
旁搜散牒何紛綸但恐千秋無信史那知一日愁官貧  
昨日西山灑微雪朝來爽氣逾鮮新腐儒哀晚精力盡  
短詠長吟忘苦辛君不見杜陵拾遺亦徒步當時裘馬  
同飛塵

同諸公陪侍葉閣學先生集黑龍潭即奉和寓舍  
對花歌韻

長安春色不可見時買花枝著眼中籃輿出門騁野興

春風無數芳林紅名園頗存濠濮意人物畧與蘭亭同  
先生袖出看花句驚才絕艷爭天工黑龍卧壑雲杳靄  
黃鸝嚙日聲沖融高臺別墅連咫尺西山翠嶂橫簾櫳  
論文永嘯傾四坐開襟緩酌須千鍾恨少金樽桑落酒  
酣歌醉倒玉山翁共覺臨流思畫舫不妨起客有遊蜂  
經年講幄侍密勿殘春休沐聊從容人生高會感知已  
追惟一日良遭逢道存丘壑豈荒宴風光欲暮憐花穠  
青峰萬古看不足躡屐還應憶謝公

豐臺看芍藥歌

是日劉蓮菴舍人攜酒率  
蜀招同阮懷雷岸兩同館

屢約尋花遊未果驟喜良朋堅促我花茵十里渾無賴  
肯數翻階紅幾朶尚書瀟灑有孤亭宴會偶間容客坐  
好風飏蕩香滿衣隨意清樽傾白墮燕山莫問黃金臺  
眼前且看叢花開一歲牡丹先落盡三春忍復遣空回  
慈仁偃松久斷折韋公西府已蒿萊帝京奇樹稱六七  
見帝京  
景物畧繁華勝事餘荒苔即今西南猶戰鬪那免憂樂  
私衷衷請君痛飲歌莫哀毋使花前白髮催園人摘花

如摘菜日日擔來城市賣花多全不恤花稀賣花聲裏  
春光歸

為鄭瑚山舍人輓其先公寶水叅憲

昔遊金陵逢舍人論詩共醉青溪春舍人叅畫親王幕  
側聞世胄本名臣今年為我述厥考卓犖淹通稱國寶  
早上公車困禮闈詞林待詔聲名好一朝薦起騰銓曹  
亭亭玉樹清風高戒絕芑苴却私謁千金擲去等秋毫  
是時國步正艱難不惜朝廷止惜官王章封事日慨慷

賈生痛哭徒辛酸東南烽燧忽如霧轉眼參藩國事去  
王臣縱有荷戈心憲使已無駐節處瘴雨腥風密箐中  
依棲不避熊羆宮解組潔身從間道著書滿屋成老翁  
聖世沈淪三十載耆舊弓旌或可待終南捷徑羞投足  
石田農圃終滄海於乎丈夫不幸真可憐吞聲抱志誰  
與傳古來義士亦如此舉頭往往號蒼天猶喜老蛟舊  
窟風雷纏二龍躍出爭蜿蜒

醉歌寄研山開府

君不見泰山雲起丈人峰  
俄頃雨澤沾寰中又不見杏  
壇古木摩蒼穹車服禮器  
猶雍容問誰主者維吾宗  
建牙秉鉞等帡幪當年柱  
史乘花驄心函冰雪臨河  
東俄稱獨坐氣何雄  
東巡特簡由宸衷稜稜玉  
尺橫磨礮百城坐嘯生清  
風戶賑人霑憫歲凶噓枯  
回槁分天工有時白簡如  
霜鋒一聲霹靂驚羣聾乃  
陳俎豆集章縫鼓吹文字  
撞鐘鏞今年正喜黍稷豐  
比屋無憂杼柚空不妨魯  
酒揮千鍾憑山臨海酖顏  
紅我昔視學思無窮尚

想躡跡河汾公

謂薛文清

葛藟異地情相通惠連把臂開心

胸祗今歲序如飄蓬安得策杖一相從或騎白鹿鞭蒼  
龍共聽清泉十二聲淪淪

### 夷門

駕言尋夷山夷山不可見徙倚城東門城郭亦屢變侯  
生七十隱抱關虛左誰迎上客還擊秦救趙亦徒爾英  
聲高義驚人間狗屠烈士何紛紛魏寢隋堤空夕曛惟  
有英雄心不死荒祠長弔信陵君



王給諫招集祝氏園林

是日同阮亭使菴果  
亭舟次蛟門峨眉

一春無日無風沙  
昨宵微雨今朝霞  
城南窈窕好園館  
攜壺並轡來看花  
白晝陰陰楊柳綠  
梓澤蘭亭叢一曲  
孤嶼回溪面草堂  
攢雲疊石成書屋  
就中縹緲飛丹樓  
簾捲西風在上頭  
主人況是王給事  
相將直作輞川遊  
去年與客同登臺  
今日追歡取次來  
狂思白鹿騁五嶽  
老憶青山倒一杯  
四座高談不得住  
尊酒纔酣春欲暮  
多少游魚唼落花  
行吟細繞池邊樹

走筆用韻答沈客子見贈

髣殘願學滄浪翁羞見桃花照眼紅  
何來詞客入京洛皎然玉樹凌天風  
才鋒不數三語掾腹笥直並五經筒  
彩毫濯出蜀江錦健腕鑄作首山銅  
投詩爛漫滿朝貴苦心追琢推良工  
公卿傾倒筵上客開樽列坐金縣狔  
春華絕艷今所少刮目那敢呼吳蒙  
誰是昌黎重昌谷鴻詞且獻蓬萊宮

送汪舟次檢討冊封琉球

九州邱垤海為圯人生牖下如蟻螯眼前馬首皆風濤  
恨不乘槎萬里潮海隅日出歸神堯分圭錫命仰

天朝皇華特簡稱人豪諸侯負弩擁星軺牙檣錦纜隨  
靈飈如山巨艦輕鴻毛玉節龍旂光氣高鞭蛟馭螭不  
敢驕島嶼蒼茫紛動搖扶桑咫尺森高標安期松子來  
招要珠宮貝闕浮烟霄橫空鰲背凌山椒噴味長鯨風  
雨交伐鼓中流吹玉簫淵客陽侯驚叫號天清浪靜無  
塵囂澄波萬頃堆瓊瑤鮫人出舞呈冰綃殊方屬國迎


旌旄曰臣北面瞻斗杓厥貢珊瑚魚寶刀任生長贖且  
釣鼇間看風物紀風謠往來破浪歌蘭橈海賦玄虛將  
見嘲

瓦上兒

健兒如鳥生雙翅飛騰屋瓦等平地漫漫長夜夜憑陵  
挾彈垂墉恣虎視短刀長箭膽氣雄嘯侶鳴儔風雨至  
明燈倒篋迅須臾捆載臨行復飛騎爾曹豈果迫飢寒  
剽掠椎埋矜故智羣行劍戟聲相磨街頭擊柝故鳴鐃

豪門健僕或格鬪儒官拱手看搜羅衣被新從質庫出  
一時將去寒則那語卿飽颺休酣歌趙張執法汝奈何  
噫嘻趙張再出當奈何

聖朝解網恩波多



學餘堂詩集卷二十三

欽定四庫全書

集部

學餘堂詩集卷二十四至

七

詳校官檢討臣劉錫五

助教臣常循覆勘

總校官庶吉士臣何思鈞

校對官檢討臣蕭九成

謄錄監生臣傅瓌芳

欽定四庫全書

學餘堂詩集卷二十四

翰林院侍讀施閏章撰

五言律

出郭

出郭見春色春風來幾時  
緩游貪日永留賞願花遲  
樂問山童種蓴從野老移  
行看南園竹新笋過東籬

春雨即事

春雨乍陰霽殘花半有無林鶯愁不語水鴨喜相呼著  
檻園庭樹分沙養石蒲蓑翁相問訊田舍已江湖

春暮

積雨閉天地初晴已暮春長歌花落徑獨步鳥隨人海  
嶠思尋藥湘湖夢采萼那堪聞戰伐回首是風塵

太白祠

太白騎鯨去空留采石祠當軒千里水遶屋萬松枝山  
月長清夜江雲無盡時誰將一尊酒把臂共論詩



燕子磯

絕壁寒雲外孤亭落照間  
六朝流水急終古白鷗閒  
樹暗江城雨天青吳楚山  
磯頭誰把釣向夕未知還

山亭

山亭溪色裏喬木散秋陰  
果落跳松鼠萍開過水禽  
入林蒼徑滑隔岸數峰深  
一坐移清晝悠然物外心

三天洞

中有三牖上見天日故名

一逕穿雲過三天入洞開  
仙宮窮斧鑿龍窟走風雷  
日

抱松根下泉通海眼來幽棲何代客禪坐有荒臺

秋夜送楚客

酒盡暮江頭歸心水急流月明分手夜風逐去帆秋客  
裏添新髻潯陽憶故丘前途君自愛寒露滿汀洲

山中掘得小古鏡

菱花作蟬翼磨滅到人間神物出何塚清光寒一山銘  
餘蚪蚪迹血蝕鷓鴣斑多病愁摧髻憑君好駐顏

玉山寺書壁

山近故園好，年来到亦稀。  
迴風陰寺閣，深竹靜巖扉。  
沙鳥下庭立，風帆隔浦飛。  
沃洲亭畔路，坐見白雲歸。

天逸閣尋邢孟貞是亡友梅朗三故居

虛館孤城外，春帆送客來。  
獨憐芳草地，頻上故人臺。  
夜月雙溪滿，晴雲疊嶂開。  
鶯花仍不減，腸斷為誰哀。

雙谿草堂

僻性逐滄浪，雙谿一草堂。  
亭穿叢篠曲，潭漾雜花香。  
錦石支書架，垂藤挂藥囊。  
扁舟將汗漫，誰與卜行藏。

敬亭雲齊閣同孟貞

連峰深翠合傑閣倚林端  
盡日孤雲在青松滿院寒  
江城晴入坐今古醉憑欄  
不是同心客何人共此看

郭瑞屏過宿荒園

握手春風暮當杯莫放停  
兩餘雲滿席夜久月移櫺  
簾巖巖鄰叟松篁覆草亭  
陶陶同永夕簾外曉峰青

水東

一路花開落孤鶯柳外鳴  
水飛懸嶂裂沙擁斷橋平  
農

圃沿溪灌郊原見鹿行相依有親舊卜築好躬耕

永慶寺送孟貞歸石臼

殘春悲遠別小飲不成醺客淚看花落鐘聲帶雨聞山鶯知選樹野鶴自離羣歸去孤舟路江潭盡暮雲

遲王公搢不至

嬾來惟謝客為爾倚衡門花亞巖中樹烟橫溪上村看山先蠟屐留月待開尊讀罷新詩後踈燈聞夜猿

借劉潤伯舟發東溪

時將適吳門

句水新秋漲孤舟逸興同帆高分雁陣濤響合松風野  
店寒烟外山城夕照中吳洲行處好猶未落江楓

買舟避兵

偷生何處得水國靜悲笳萬事數行淚孤舟八口家隨  
風依岸柳載雪隱蘆花不是尋源去虛疑博望槎

栗園何氏山莊

栗園地名  
在水東

野靜寒烟薄秋深暮景斜清泉逢谷口老樹識山家餉  
客霜林果登盤礪圃瓜村翁還揖讓不媿灤溪涯

袍笏嶺

避地寧辭險攀蘿得逕偏陰巖風嘯虎半嶺石叅天獨  
木立寒色羣峰交暮烟干戈歸未穩惆悵白雲邊

亂後和劉文伯郊行

斜日照荒野亂山橫白雲到家成遠客訪舊指新墳戰  
地冤魂語空村畫角間相看皆墮淚風葉自紛紛

暫歸雙溪敝廬

客久斷音書重歸感舊居魂招征戰後淚似別離初鼠

穴呼兒塞蒿園借火鋤艱難疑去住敢信是吾廬

哀族叔汝毅罹兵難

全身無早計蹈刃復誰憐歿後遺書債生前乏酒錢癡兒甘失學孀母怨長年喪亂猶如此魂歸何處邊

早春聞子規

柳條綠未遍已有子規啼春色此中去行人何處迷繁華芳樹下世事竹林西向夜含情坐空潭片月低

哭妹壻梅聖起



萬事君都已孤墳我獨悲有生惟卧病臨訣尚留詩年  
弱憐吾妹啼多抱汝兒瓊枝折太早零落竟誰知

吳季野若金見過因同哭亡友祖洲

亂後幾人全相逢溪水邊瓢流詩卷去壁任野藤穿聚  
散成浮梗存亡逐逝川山陽遺宅在聞笛一潸然

聶輯五明府晚宴籍山亭

清夜飛鳬舄華燈勸鶴觴歌翻白苧曲坐泛碧荷香傲  
吏親書卷秋山入草堂從來習池好倒載興難忘

喜過葛元士

歲晚滄洲卧懷君未易尋  
三春風雨盡一逕水雲深  
老積驚人句窮堅避世心  
素交離亂後一醉北山岑

九日登玉山同沈永清

嬾摘籬邊菊還尋溪上山  
當杯萬嶺出歌帽兩人閒  
寺磬叢篁外村煙亂水間  
眼看楓葉老一倍惜離顏

與王兆京同年宿敬亭

不辨翠微色秋山紅葉重  
褰裳隨去鳥拄杖倚孤松  
人不辨

卧半牀月風傳萬嶺鐘曉攀天際閣目斷白雲峰

重宿句容崇明寺

舊識僧都盡重來客惘然空階雙樹老孤閣一燈懸塔  
隱寒雲外山明夜雪邊華陽仙洞近高卧定何年

醉翁亭

上有古梅稱  
歐陽公手植

水石潺潺處孤亭疊巘西松雲陰覆瓦山靄碧連溪古  
樹千年在嬌鶯盡日啼誰堪同一醉歸路不愁迷

答楊生俞之

十載論文倦追隨  
覺爾賢分燈消永夜  
持粟購殘編世  
難安儒術年荒倚石田  
苦吟吾自癖莫漫向人傳

頓坊夜發

羣動息中夜勞人思早行  
馬嘶鄉夢斷月照客牀明  
出堡頻呼伴停車各問程  
馳驅今已慣不敢怨宵征

將次涿州值烈風

已墮關山淚那堪行路難  
風回摧戍堡沙聚沒征鞍  
劃地龍蛇鬪飛空雨雪寒  
黃塵愁極目咫尺蔽長安

慈仁寺松

直欲凌風去翻從拂地看  
摧殘經百折偃仰鬱千盤  
老閱山河變陰魚日月寒  
支離爾何意不厭卧長安

送汪顥若發若下第歸江南

憐君兄弟好射策壯心違  
且酌江頭酒重開竹裏扉  
草隨征馬綠春與故人歸  
舊業陽坡上朝朝倚翠微

真定道中

白日孤城閉黃沙古道迷  
風鳴關塞北雲斷海天西  
歸

路看烽火生涯信馬蹄故園楊柳綠幾處早鶯啼

張旭之下第南歸

萬里成聯騎離亭送獨歸懷才寧失路忍淚復霑衣  
北柳初發江南花亂飛老親雙健在調餽及春暉

晚渡黃河

日落渡黃河相逢半負戈漲泥尋路少孤店拒人多  
疏鑿思前列隄防總逝波年年沈壁馬無計斫鼃鼃

興教寺閣

亂離存古寺僧少磬聲微今日高樓坐正看桐葉飛秋  
陰庭樹改夜雨客心違遠見江帆影行人何處歸

七里山尋徐九

谷口逢僧問山頭見爾廬編籬門徑曲面圃野堂虛半  
嶺存孤寺諸泉到一渠桃源成獨往莫使故人疎

得邢孟貞書

憐君作客老轉說住家難歌豈甘彈鋏狂應厭釣竿甲  
兵天地窄襖褐雪霜殘惟有湖中月年年耐獨看

移居東郭

偶卜城東宅臨流有石臺  
潭烟依檻集山色度溪來  
蠶月桑枝蔭鶯時柳葉開  
先人敞廬在佇望獨遲回

谿漲

谿漲全無岸沙田又可哀  
舟航浮郡郭荇藻冒樓臺  
過雨重雲黑奔雷動地迴  
蛟龍橫得意白日向人來

乍霽

乍霽衆山出登樓散客愁  
濕雲歸未盡賸水斷還流  
溪



暖銜泥燕林藏喚雨鳩  
田家憂不細二麥已無秋

懷顧與治秣陵

六代衣冠地風流盡屬君  
論交千古士卧對一江雲  
竹館春陰合山城夜雨間  
知音已零落何事復離羣

入華陽

華陽高百仞絕頂倦登臨  
隔嶺通文脊遙峯接武林  
雨從山半落日在谷中陰  
却愧蘇門嘯空聞鸞鳳音

二華陽施氏烟  
火連數十里

吾宗卜築好村舍  
適郊原雲氣人烟亂  
牆陰虎跡存  
栽花連栗園  
接水灌茶園  
共有羲皇意  
深居可閉門

力疾赴官比部奉別家叔父

辛卯

抱疴甘伏枕  
語別即沾巾  
風雨殘春路  
關河獨去人  
無才安宦拙  
寧儉補家貧  
祿養嗟無及  
吞聲憶二親

雨泊蕪江

鳩茲烟水地  
春盡重淹留  
皎月何時見  
孤帆永夜愁  
漲江來楚蜀  
寒雨動林丘  
謝朓青山近  
淒淒暮草秋

張來初吏部園林

平子歸田早于湖傍碧岑欄花開竹外浦樹落庭陰杖  
屨天門健文章楚水深相憐贈香草別後故人心

懷侯韓振藍山

貧苦日相共宦游天一涯有官真似水無夢不還家五  
嶺來山瘴孤城接塞笳別離春已暮多恐髯將華

江口三昧菴

時泊兵艘  
僧皆閉門

日日旅愁新尋幽及暮春老僧留過客芳草伴閒人戰

艦徵兵日文園抱病身江山連杖屨不厭往來頻

驚峯寺寓

曲徑秦淮畔精廬驚嶺間夕陽沈積靄空翠見前山無  
事客疎放能詩僧往還青溪好明月夜夜照松關

淳湖尋邢景之

四海倦游後還疑汎愛非寸心如落木逢爾復春暉移  
榻連蔬圃烹魚出釣磯清懽成信宿不是醉忘歸

河上逢人歸故鄉

聞語忽沾裳。知君是故鄉。舟中頻換月，水上易為霜。山  
過淮南遠，天隨薊北長。裁書尊酒畔，分手恨河梁。

舟曉

曉夢鄉關裏，俄驚鼓棹時。鷄鳴知市近，岸轉覺舟移。雲  
樹分曦早，江村出霧遲。釣船魚喚買，恰稱及晨炊。

登張秋戊己山

渚岸一峰出，林端萬木齊。荒臺臨埤堦，古廟鎖蒿藜。地  
濶河流細，天長岱嶽低。夕陽催客下，野水亂東西。

月下懷賦得沿月棹歌還

月明無近遠一見即沉吟  
況值孤舟夕難為游子心  
清光連極浦逸響寄空林  
此夜思君意江流孰淺深

夜值西曹

吏散秋官署更闌夜氣清  
疎簾寒燭影急柝亂砧聲  
露下園扉濕天高貫索明  
平反誰執法竟夕獨含情

郭漢州庶常改官給諫

久作金門客重聞寵命新  
然藜猶昨夜補袞屬茲辰  
地

接龍光近心悲雁戶貧  
聖朝方納諫不必憚批鱗

出都憶同寓諸故人

燕臺同作客風雨對銜杯  
話及故鄉好心知別路催  
關山孤夜月僕馬散秋萊  
北雁能為伴南飛幾日回

使過陽信抱關無吏諸生  
數輩出尊簋曰吾輩皆  
誦習先生文章毋庸驛吏  
也留詩贈之

吏已絕逢迎人猶識姓名  
驅車周四牡供帳魯諸生  
野館秋雲入荒城畫柝鳴  
艱難看逆旅一飯重含情

田芳伯同余南旋至淮上別

芳伯失職久客京師鄉人傳為死矣

千里同袍子分為行路人鄉書斷京國旅食老風塵身  
在妻孥哭途窮僮僕嗔君過漂母廟拜手薦江蘋

淮口舟夜

風便不能發柝聲連夜長關河迷去住鷗鷺得行藏烟  
盡初冬月天寒未曉霜萼鱸鄉路近客思倍難忘

真州榮園

疊石鬱嵯峨蒼茫氣象多高低成洞穴庭城俯山河巢



集臨江鶴花生帶雪柯向來歌舞地長卧老藤蘿

二

主人營此園數十年  
嘗以千金置一石

歲月為園盡天然事事工亭臺入雲表戶牖絕雷同片  
石千金得三江一澗通平生丘壑意浩蕩對花叢

哭梅雨吉

獨負才無敵為君兄弟難前生定長吉後死倘都官玉  
樹人間盡青衫地下寒空流殘婦淚墳土不曾乾

聞劉潤伯捷武闈

王粲從軍日班生擲筆初應為萬人敵莫負十年書日  
月烽烟蔽江山戰壘餘儒冠真寂寞躍馬定何如

赤壁

亂石寒烟路千年人自游峻嶒存赤壁虛白俯滄洲百  
戰亭臺盡三春江漢愁誰憐詞賦客今古一孤舟

登江夏洪山寺壩

時官軍  
方南征

峰頭開古寺壩下俯浮雲山勢龜蛇鬬江流沔漢分柳  
荒陶侃廟風競伏波軍南望湖光白鴻歸度夕曛

泊嘉魚

有赤壁是周  
瑜破曹操處

濤翻天地合，向夕早維舟。  
江月人難夜，津亭風易秋。  
危巖尋赤壁，春水沒芳洲。  
欲問漁家路，滄波自北流。

二喬墓

銅雀臺遺恨，巴陵塚尚留。  
君臣分艷質，吳楚一荒丘。  
花落春雲暗，猿啼暮雨愁。  
湘江有神女，應共弄珠游。

望君山

上有軒轅鑄鼎臺  
秦皇過此舟幾覆

孤嶼凌天險，滄波遶翠微。  
四時芳草暗，萬古白雲飛。  
軒

帝臺應在秦皇事已非欲尋方竹杖仙路隔危磯

湘夫人祠

帝子蒼梧望荒祠楚水湄湘雲搖珮帶岳雨送旌旗夜  
靜魚龍入情深草木知維舟尋往蹟春蘚沒殘碑

自潯陽至長沙舟中禱咏

狂歌多楚調宜入楚鄉游水濶蛟宮險林深虎穴稠樓  
船馳使節簫鼓襍巴謳春色來何速青青杜若洲

秫賤偏無酒愁來少醉眠荒村依岸曲古廟立山巔水  
驛舟為騎魚鄉網是田石尤風太數搔首郢門煙

三

鼓枻隨漁父乘槎老客星鶯聲花嶼暖龍氣雨潭腥波  
綠澄湘浦天青合洞庭誰知魚子飯絕勝五侯鯖

四

野鶴偏知雨鷺人自喚風雲開七澤盡春漲五溪通橫  
海樓船遠征蠻芻餉窮泊舟時夜警卧倚寶刀雄

五

翠竹似松杉蒼蒼隱洞巖開蓬過水市歌案趁風帆雲  
自青莎出魚從白鳥銜瘴江驚早熟二月脫春衫

六

畏路天垂盡湘南去路遙鮫人登賈舶山鬼避星輶賈  
傅魂空弔靈均恨未消羈棲卑濕地故國果雲霄

灘舟即事

湘潭至衡山數十灘石潛水底例以土人曳小舟前

導舟曰引洪人曰灘子

泝盡湖湘險衡山路更難引洪舟一葉穿石水千盤人  
沒龍湫得巖侵猺洞看經旬行百里岳雨暮春寒

花藥山相傳何仙姑采藥處

杖策尋仙蹟乘春醉羽觴藥鑪青嶂遠環珮白雲長巢  
鶴依山寺林花發野棠孤亭面衡嶽北望正蒼蒼

排山驛

山外無平地巖中有宿雲生猺安鼠穴猛虎襟人羣日

出巖烟暗天低瘴嶺分艱難經喪亂吹角更堪聞

永州南數十里夾路皆古松

何代松林古婆娑擁道周鬼神深窟宅烟雨蔽山丘  
白鶴一羣老清陰百里秋眼看遭剪伐劫火幾時休

經王公嶺白雲菴

峻嶺留精舍危亭半夕陽瘴雲官路濕春草寺門荒  
飛矢散猿隊鳴銃驅虎倂凭高聊極目粵嶺一何長

全州道中



驛路入樵徃森森古樹中異香羣卉葆深翠象山同滴  
慙藤花雨吹衣松葉風春光將客意萬里去無窮

二

途雨行無次孤村烽火餘山厨連馬廐官舍奪僧居樹  
古偏供爨人稀廢趁墟東西看麥壠寡婦把犁鋤

昭江別周汲菴副使

天末故人見尊前鄉語多看山晴共出乘月夜相過猗  
戶能輸布蠻方罷枕戈龍門驛畔路分手恨滄波

發昭潭

瘴路已深入蠻江更獨行  
搖搖逐峰影颯颯隨灘聲  
磎壑蛟涎出衣裳蜃氣生  
戈船思漢將從此向南征

昭江夜泊

驚濤自風雨樹杪復飛泉  
萬籟集清夜孤舟浮綠烟  
夢歸鄉路怯客病榜人憐  
明發蒼梧近應看下跼鳶

次答沈梧州送別

別緒不可理茫茫失所思  
斷蓬吹更遠疲馬策難馳  
脫

贈平生意殷勤去後期三湘風雨夜應有夢君時

端江旅興

江泊依榕樹幽尋過竹梁雨來山乍白日落水全黃橫  
浦戍樓迴綠溪村巷長雪中風土似少婦有提筐

二

遠游多病後獨步落花時野艇收魚子溪蟲哺鴨兒披  
榛茉莉出夾道荔枝垂信美長為客茫茫故國思

端州贈別沈止嶽少叅

東游非汗漫強半為君來硯試端江石尊移越海臺干  
戈蠻洞洗日月瘴鄉開惜別仍留句誰知沈約才

五日東莞王句重明府宴津亭

天南初罷戰彩鷁到江城荔子乘舟摘蒲觴帶雨傾親  
交佳節會兒女故園情莫憶懷沙事愁雲海畔生

沂昭江雷霹灘懷尹奠階太守

灘聲雷雨內天險奪龍門峽束水斜立濤驅石盡奔浪  
江生白髮烏鵲報黃昏咫尺美人隔孤帆不可論

南華山寺

祖衣留嶺外古剎面滄洲地濶巖扉綠松高塢院秋荒  
臺過虎跡靈瀑吼龍湫誰識曹溪意年年水自流

大庾嶺

峭壁何年鑿炎洲北路開門容一騎入人度萬山來南  
北各回首干戈更築臺蓬蒿行處滿漫說嶺頭梅

十八灘

人老三秋後舟臨十八灘落帆循石罅解纜趁江湍久

霽衣裳濕重雲燈火寒柝聲連鼓角無夢到漁竿

中秋夜泊樟樹鎮

時初脫粵西之難

又是中秋夜三年客裏過影孤彭蠡雁路遠洞庭波鄉  
信逢人問羈魂在水多故山有明月好與照藤蘿

雨宿三疊泉下凌雲舍

竹屋住雲根蒼巖帶雨痕燎衣當茗竈移石槌柴門泉  
響千林動峰開五老尊來朝攀絕頂俯仰盡乾坤

九日廬山尋瀑布絕頂處

去開先寺數里登文殊壩泉出趾下

良辰采巖菊振策入寒烟獨倚層峰塏回看百丈泉奔  
雷翻絕壁晴雪下高天客到都無語蒼茫落照前

黃巖寺

在雙劍峯下  
瀑布泉上

山中誰說法雙劍化為峰寺倚懸巖石泉飛半嶺松香  
臺鳴野鶴瓦鉢貯潭龍欲覓林間洞雲深谷口封

孟貞病寓草閣

契濶能相就粗疎媿主人天風吹短榻厨飯煮勞薪坐  
語從深夜相看各病身幾年拋藥餌一醉紀家春

宣城  
紀叟

善釀見李

太白詩

人日涇川

人日日初晴春風昨夜生野梅誰早折凍土又新耕餘  
雪涓涓白流澌瑟瑟鳴琴谿聞控鯉駐馬一含情

涇川大安寺

作客必投寺居然一老僧春光門外水夕梵雨中燈馴  
鵠自來去閒心減愛憎西峰晴更綠夢已到峻嶒

留別施元引學博



青氈偏好客白雪更知音竹葉時相餉桃花日共尋晴  
山開木末馴鹿卧庭陰良會難為別滄江去路深

偶過鄭扶九看牡丹

地有葛洪丹井  
琴高藥渣魚

名園連客舍高士復閒居春盡芳菲裏天晴爛漫初試  
茶丹井水入饌藥渣魚隨意此終日狂歌野興疎

登幕山同左稚姜

山故左難  
當駐兵處

春送登臨眼山留戰伐名寺門銜極浦杯底見孤城世  
定英雄伏林間麋鹿行憑君詢舊壘指點暮雲平

悼梅母趙太君

時被火厄

令德宜彤管魂銷撒悅時祝融迎玉珮風伯尊靈旗此  
去驟鸞急重來化鶴遲賢愚同一燼千古共淒其

為蔡大美悼令子須才

令子趨庭好高堂永訣難問寒留夜火負米進晨餐苦  
學青箱在多愁玉樹殘尚餘窓外竹刻遍翠琅玕

學餘堂詩集卷二十四